

四庫全書

集部

欽定四庫全書

集部

湖山集卷一至三

詳校官庶吉士臣柳邁祖

主事臣呂雲棟覆勘

謄錄監生臣王人作

謄錄監生臣秦澧

謄錄貢生臣王兆泰

欽定四庫全書

集部四

提要

湖山集十卷

別集類三

宋

臣等謹案湖山集十卷宋吳芾撰芾字明可自號湖山居士台州仙居人紹興二年進士官至禮部侍郎歷知數郡以龍圖閣直學士致仕事蹟具宋史本傳芾為祕書正字時以不附秦檜劾罷後金師臨江芾建言有進無

退請高宗駐蹕建康以繫中原之望其領郡亦多惠政蓋非徒以文藝擅長者然其詩才甚富往往瀾翻泉湧出奇無窮雖間或失之流易要異乎麤率頽唐如輓元師宗澤諸篇尤排奐縱橫自成一格據集中自述芾生甲申歲當崇寧三年建炎初尚未及三十而筆力已挺健如此其後退閒者十有餘年年幾八十乃漸趨平淡和陶諸詩當作於其時亦

殊見閒適清曠之致集中有寄朱元晦一詩
曰夫子於此道妙處固已臻尚欲傳後學使
聞所不聞顧我景慕久願見亦良勤是其末
年亦頗欲附託於講學然其詩吐屬高雅究
非有韻語錄之比也周必大集有節湖山集
序稱集二十五卷長短句三卷別集一卷奏
議八卷和陶詩三卷附錄三卷當塗小集八
卷本傳又稱表奏五卷詩文三十卷所載卷

目殊牴牾不合原本亡佚無從核定今據永樂大典散見各韻者采輯編訂釐為十卷以和陶詩并入而仍取必大原序冠之史稱帝為文豪健峻整是其雜著亦必可觀惜永樂大典中已經闕佚僅得表一首序一首附之末卷以畧存其概云乾隆四十六年九月恭校上

總纂官_臣紀昀_臣陸錫熊_臣孫士毅

總校官_臣陸費墀

原序

才氣可以任事而以學術本之未有不為名臣者也龍圖閣直學士天台吳康肅公以進士起家受知高廟爰及孝宗在內為御史歷吏戶禮刑少常伯給事中又嘗典治內史在外則五為帥守處劇繁以平易其才氣何待言至于履正奉公仁民愛物如嗜飲食發為詩文身簪紱而心丘壑此則學術之力也其子嘉興太守洪裒公遺文號湖山集二十五卷長短句三卷別集一卷奏

議八卷遠來謁序予與公同朝久知公熟公雖志在功名而議論專以恤民為主復躬行之自非才氣學術兩皆有餘何以臻此當乾道庚寅公帥豫章胡忠簡公邦衡以泉守予以閩憲俱入奏事過焉燕集欸甚將別各為二詞以送備載集中自是力請奉祠繼以掛冠享林下之樂者十有六年其詩詞益多意遠而辭達使人讀之蕭然有出塵之想予嘗評公侍從如嚴徐彈壓如趙張循良如龔黃止足如廣受凡西漢名臣殆可兼之然

尚有一說始紹興甲子六月公以祕書省正字輪對奏江浙昔號粒米狼戾雖歉歲斗直二百今歲豐反倍之蓋由州縣重征稅監官覬羨賞巡欄利括取若蠲其筭價自平矣高宗大喜七月有旨從之仁言之利其溥如此當路忌其直諒是月出倅括蒼予為祕書少監得此事于日厯厥後上用公執法主計宣徒然哉勅局編類紹興寬卹詔令載之七十一卷之首例曰臣僚奏請當時士大夫固未知出于公今奏議復不載予故特書之

以彰高宗愛民用人之美意且明儒術可富天下之大
端云嘉泰三年五月日具位周必大序

欽定四庫全書

湖山集卷一

宋 吳芾 撰

和陶詩

和陶停雲

淵明抱節不渝風雨為米折腰頗厭艱阻歸卧柴桑孤
松獨撫希蹤前賢寤寐傾佇

眷茲衡宇草樹溟濛坐對五柳遙望九江亦足寄傲東
軒南窻獨恨無人載酒相從

我頃雖達不足為榮擬攀逸軌少適真情遐賞風味魂
夢宵征葛巾藜杖髣髴如生

吁嗟人世如彼南柯正宜閒處養此太和縱使得意位
高金多老不知止寧逃譴呵

和陶勸農韻勉吾鄉之學者

士農工商古有四民惟儒最貴但患非真誠能力學進
必有因儻或中輟豈能為人

譬如田家所仰黍稷要當早夜勤于種植情而自安不

稼不穡歲云暮矣何由足食

吾鄉人物散處川陸宜無秀民生而清穆亦既從師步趨隨逐亦既窮經訪尋歸宿

奈何人性易流難久纔及長成即求配耦稍得其資復營南畝自暴自棄有同游手

大抵名儒宜患窮匱大抵外物豈在僥冀學成道尊富貴自至不學空虛非惟自愧

縱得美官人亦見鄙若博羣書更兼素履雖處常流亦

超塵軌一旦進為必兼衆美

和陶命子韻示津調官

我愛二龔絕勝二唐克著清節終始有光夫豈不知伊
傳在商相湯洎高俱致明昌

又豈不知道否晚周天縱將聖獨有孔丘卒老于行靡
憚周流胡為潔已耻事王侯

曰豈不欲効彼羣龍潤澤萬物助成歲功潛而不用夫
豈自封懼將有悔不顯其蹤

喬木千尋竟困斧柯屈原特立終隕汨羅水行地中尚
值坳窪縱如賈誼猶滯長沙

勿謂吾身有才有德可以安世可以益國不善用之鮮
不為忒所以古人戒之在得

我幸此生不忘本始身雖朝廷心實田里所以暮年知
足知止以進為憂以退為喜

汝能傳家一第已及使進而為不患無立奈何親老奉
親為急莫待異時徒然涕泣

我不望汝勲業濟時縱得入侍朝夕論思欲供子職何
如在茲人能盡孝忠豈遠而

既有餘力且親燈火讀破萬卷百倍于我我恨書少意
不自可汝能雪耻天亦見假

我本白丁恩及童孩雖由先德亦自書來汝誠博古為
世實才時或未遇又何憊哉

和陶歸鳥

翩翩歸鳥投宿深林豈無所擇相彼遙岑厥有嘉樹可

以託心雖逢赫日終貯清陰

翩翩歸鳥亦已倦飛平林在望非此曷依是用歛翮一意來歸世網雖密密容或我遺

翩翩歸鳥慮患徘徊四顧萬里獨有故棲故棲來反所願已諧毋思寥廓擾擾此懷

翩翩歸鳥顧影蕭條亦既休息斂此風標仍遇儔匹其鳴交交營巢雖苦亦復亡勞

和陶形贈影

吁嗟汝依我自有此身時跬步不相捨皆隨我所之使
汝動必正端本皆在茲念我已衰老自知死有期行且
與汝別此心寧不思但我不畏死亦耻涕漣而且把一
尊酒話別汝莫疑淵明甫中壽已作挽歌辭

和陶神釋

人生稟一氣自微而至著不問富與貧不論新與故自
有形影初我便相親附二子既有言我寧無一語汝形
未生時影復在何處偶與我有緣同生復同住幸我所

依人造理仍知數身雖未溘然已辦周身具得酒即忘
懷寧復顧毀譽醒即看雲眠目送孤鴻去我亦得安閒
不憂還不懼說與二子知莫為身外慮

和陶示周續之祖企謝景夷韻寄朱元晦

我愛朱夫子處世無戚欣淵明不可見幸哉有斯人奈
何不苟合進用苦無因夫子于此道妙處固已臻尚欲
傳後學使聞所不聞顧我景慕久願見亦良勤第恨隔
千里無由往卜隣安得縮地杖一到建溪濱

和陶與殷晉安別韻送陳順之赴官

子往治畿邑趣裝亦良勤
惠然來過我話別更情親
顧我老且病已與死為隣
獨思陪勝侶倍覺惜清晨
忍唱陽關徹與子從此分
願子且少駐醉我甕頭春
子雖未宦達意氣已凌雲
今去天尺五騰上豈無因
要無求速化切莫慮長貧
抱才能自重何患不如人

乍晴與客登眺和陶和胡西曹韻

方欣秋氣爽庭戶生涼颼
俄然毛骨冷霜露侵人衣
乍

霽還可喜領客登翠微猶有籬下菊不見園中葵徘徊
視景物似與人俱衰幸有杯中物何妨時一揮人生得
行樂老去未為遲宋玉猶未老何事苦多悲

和陶悲從弟仲德韻哭陳澤民

年來朋舊少大半已彫零人物如吾子共謂上青冥行
年纔五十歎惜負平生憶子初見我我意已先傾愛子
器識遠佇子功業成縱不登要路亦必享遐齡貳邑曾
未久早已聞政聲方將脫選調榮養娛親庭天公亦何

事于此獨無情一旦棄我去不復見儀形痛傷風月夜
空對酒尊盈

和陶始作鎮軍叅軍經曲阿韻哭陳能之

陳公行古道出處盡堪書俯仰端無負初終總一如粵
從為劇邑平步上亭衢正色主風憲彈劾靡親踈故雖
頻補外直性不可紆召還方進用謂當推緒餘一朝忽
櫻疾力請歸舊居竟化遼東鶴不作北溟魚哀哉名世
士天胡賦分拘有子傳衣鉢無錢治室廬

和陶阻風于規林韻寄陳時中二首

退處固云樂未免歎索居賴有陳使君情親如友于自
應長相見豈謂各一隅我雖事跼伏閉門懶問塗無日
不看山無時不面湖君尤我所愛良會安得踈縱不思
風度亦欲聞緒餘會須成二老君意定何如

人皆有還往我獨無所之若不見君子誰與同襟期嗟
我已衰老無復少壯時縱使善衛養豈能長在茲願言
時命駕容我親色辭我已不强酒從今君莫疑

和陶赴假還江陵夜行途口韻寄江朝宗

居閒歲月久萬事心已冥獨于同調人猶未能忘情憶
昔桂花發君來訪柴荆把酒坐花下歡然話平生今年秋
更好花還照眼明無由共清賞幽恨已難平那聞遭橫
議意頗悔西征既不樂朝市却思巖石耕古來未遇者
寧免寸祿榮要當且隱忍勉強就功名

和陶已酉歲九月九日

天地氣將肅秋冬候欲交眷茲萬木落感我雙鬢彫悠

然清興動與客共登高有巖號景星萬仞連雲霄一覽
快心目寧辭杖履勞但恨無酒量一舉如沃焦仍恨無
坐客可繼五柳陶且拚風帽落聊醉菊花朝

和陶庚戌歲九月中于西田穫早稻

東風纔解凍農事已開端田夫競力作不獲須臾安淵
明于是時亦宜容坐觀日出負耒去入夜乘牛還寧不
憚勞苦要得逃饑寒顧我獨何幸雖知稼穡難逢秋但
一飽此外了不干回首視淵明已是增汗顏那堪萬事

拙只得長掩闕誦公獲稻句倍為公興歎

和陶丙辰歲八月申于下湣田舍獲

淵明事南畝躬自獲巖隈雖復竭吾力却得舒我懷所
收既不薄卒歲事可諧隣家相慰勞競持酒與雞留連
相酬酢入夜未能迴回思往歲歎舉目俱堪哀憂心今
幸釋笑口何妨開須傾瓦盆盡須放玉山顏已是從吾

好寧憂與世乖任他田父哂未足為高樓

淵明飲酒詩
載田父見疑

之語有曰繼續茅
簷下未足為高樓

和陶詠貧士七首

士貧亦常事但視其所依苟能依于道暮景亦有輝淵
明生亂世初不求奮飛為貧聊一出違已即言歸歸來
坐衡宇無粟可療饑作詩詠貧士泰然曾不悲

淵明抱歸興未老辭華軒應謂役于人豈如歸田園在
家貧亦好滿眼是風煙親戚可晤語書史可精研妻子
識此意相對無間言時取新酒漉一笑中聖賢

我家未為貧尚有綠綺琴手雖不能彈頗喜聞遺音時

時命女奴強於弦上尋聽罷方寸適取酒時一斟顏回
與原憲平日我所欽儻得從之游雖貧亦甘心

新春來未幾已見日在婁游人怕春去把酒急獻酬折
花各盈把行歌滿道周貧者壁四立若不堪其憂亦復
典春衣買酒呼朋儔一醉人所嗜此外非所求

我愛徐孺子高名滿江干衆人皆欲仕乃獨耻為官曾
不憚辛苦負耒營一食清節映千古至今聞者寒洪井
有祠宇我嘗瞻其顏不覺愧汗下竟歸長掩關

光景如春花身世似秋蓬淵明洞此理養拙不求工上
獨思四皓下獨友兩龔出處雖或異心跡亦畧同安貧
抱全節雖窮亦如通九原儻可作我欲以身從

入仕已四紀把麾還六州曾未見縣令有若淵明儔稍
屈便引去高致更風流醉卧衡門下曾無寒餓憂獨抱
千金璧未許人輕酬聲名傳不朽千古仰前修

和陶詠二疏韻

世人耽寵榮往往麾不去日已迫桑榆馳騫方成趣誰

肯急流中便作冥鴻舉屈指數哲人在昔獨疏傅萬口
共稱賢餞送塞歸路天子亦嘉之賜金示優顧淵明作
此詩端欲迷者悟我觀二疏高豈無子孫慮揮金以自
娛益表清節著

和陶讀山海經十三首韻送機簡堂自景星巖
再住隱靜

我自歸林下亦復與世疎賴有善知識時能過吾廬伴
我說道話我愛讀佛書師為巖上去我亦為膏車便欲

展我鉢隨師同飯蔬脫此塵俗累長與巖石俱此巖固
高矣卓出山海圖但比吾師高還恐巖不如

我生山窟裏終朝面孱顏獨此巖未到抱恨知幾年茲
遊信奇絕一覽小衆山更得師為主二妙為易言

幽棲非不勝觸目是林丘若比茲巖秀培塿固難儔雲
山千里見石泉四時流登臨有如此何必更他遊

我年七十五木末掛殘陽縱使身未逝亦豈能久長尚
冀林間住與師共末光孤雲俄暫出道俗紛蒼黃

愛山端有素拘俗亦可憐昨守當塗郡不識隱靜山羨
師來又去愧我復何言尚期無久住歸送我殘年

師心如死灰形亦如槁木胡為衲子歸以鄉音答空谷顧
我塵垢身擬向禪河浴更願張佛燈為我代明燭

扶疎巖下樹入夏總成陰幾年荊棘地一旦為叢林我
方與衲子共聽海潮音人生多聚散離別忽驚心

我與師來往歲月雖未長相看成二老風流亦異常既
宴坐巖上我方為聚糧倘師能早歸此樂猶未央

紛紛學禪者腰已競奔走才能脫葛藤癡意便自負求
其道德尊如師蓋希有願傳上乘人永光臨濟後
吾邑多緇徒浩浩若雲海大機久已亡賴有小機在乃
更與一岑純全兩無悔堂堂二老禪海內共期待
古無住持事但只傳法旨有能悟色空便可超生死庸
僧昧本原豈識西歸履買帖坐禪牀佛法將何恃
僧中有高僧士亦有高士我雖不為高心粗能知止師
是箇中人特患不為爾何幸我與師俱是鄰家子

師本窮和尚我亦窮秀才忍窮俱已徹老肯不歸來令
師雖暫別泉石莫相猜應緣聊復耳師豈有心哉

和陶挽歌詞三首

吾年七十五壽命不為促仕僅五十年出處粗可錄人
生會有盡自應身就木寄語親舊輩不必為我哭百
年如一夢吾夢令始覺亦既了萬緣無殆亦無辱所欠
惟一死得死令已足

嗟我在生日一飲數十觴有時無酒飲亦復潑醅嘗令

日雖有酒羅列在我傍對之徒自歎與世隔風光所幸
埋骨地不離雲外鄉魂魄時一遊此樂猶未央

老眼日昏昏華髮日蕭蕭不死竟何待理合葬荒郊荒
郊何所有四面俱岑崟榮木望秋落亦已成枯條青松
為我夕白石為我朝仍幸二親墓相去無幾何令得從
之游歡喜如還家我心既歡喜安用挽者歌有人來奠
我但問山之阿

和陶桃花源

我聞桃花源其先自秦世當時避地人歲久俱已逝其
後長子孫生理還不廢種桃以自營結茅以自憩有兒
但發蒙初不工六藝有田但收禾了不輸二稅有雞只
晨號有犬不夜吠淵明愛其真為此成新製我久聞其
風褰裳思一詣所慮路難通仍恐水難厲夢寐不能忘
抱恨知幾歲所恨天見私于此施嘉惠貽我萬株桃漫
山迷眼界却勝武陵溪草樹相蒙蔽相去復不遠只在
吾廬外人號小桃源景物適相契

欽定四庫全書

湖山集卷二

宋 吳芾 撰

五言古詩

春雨不止魯漕有二詩因次韻

青春能幾何況已過寒食此時對東風一日亦可惜正
好倒清尊呼婦妾鳴瑟胡不少自寬兀坐有憂色一春
雨已多連日風更力安得補天漏坐待江月白

春日固喜雨雨多亦可已若為尚霧霤連月煙浪裏江

金匱要略卷二
湖更瀾漫不見蒲與葦有時漏日光烘雲薄如紙欲晴
又復陰何以慰田里鬱鬱不能舒一坐四五起

和陳平仲中秋懷舊遊

天末逢秋半臨流翫佳月置酒延孤光夜久涼風發感
時歌慨慷醉來翻不悅念人有聚散念月有圓缺萬事
轉頭空百年飛鳥瞥粵從惟亂離頭角嗟垂折兀坐山
谷間何人定交結素琴已塵埃孤劍尚清刮故人不可
見幽懷欲誰說明明自團團憂憂空烈烈忽得陳子詩

辭旨兩奇絕歷歷叙舊遊筆端如有舌何處復相從酒
壺行自揭遙想鮑與劉應亦歎胡越要當按酒兵無令
冒斧鉞吾儕豈長貧廟堂方簡拔

符倅同遊鴈蕩賡其所和范相遊山韻

晚學愧淹博微官妨隱盤攀龍榮請事斂板喜承顏懦
庸資盼睐簿領洗塵煩南豐茂人傑才望藹江關題輿
裨德政鎮俗念時艱仙山尋勝外妙句落人間氣連天
柱壯清奪霜空寒一讀三歎息髮立誰敢謾但嗟俊逸

才尚滯海之灣中興急賢哲日日聞賜環況復有如公
騏足寧久閒會須早命駕即日當召還發硎觀利器斷
鰲新海寰宣室佇前席顧問應夜闌

寄季元集

劒池有逸人過我談名理自謂出囂塵知足更知止高
標拂煙雲雅志在山水既作陶淵明且慕赤松子我方
聞緒餘固已生歡喜正欲叩淵源獨恨未暇耳忽云桐
柏山此去甚密邇擬一往其間尋真訪遺址不久便可

還畢此玄妙旨一去寂無音逢人問行李人言不復來
征車已西指反把遊山屐去踏長安市似聞稍留連尚
稽歸故里未免傍人門乞憐應忍耻縱使得美官所喪
亦多矣嗟哉人學仙如君能有幾冥鴻合高翔不謂
事乃爾徒有懶窩名却入旋窩裏始知聽空言未
若觀素履意者天愛君要君行處是慮或成沉迷
敗道自此始聊復小撓之欲其全暮齒庶發堅固
心永無塵念起

江行阻風

我生走四方足迹亦幾徧初未識江行每起浮家羨一
從登此舟舉室盡欣抃既得捨車徒且免入郵傳高枕
卧短篷頓忘行役倦始謂旬日間便可朝行殿縱未許
歸田行止亦可判那知事好乖一夜狂風轉怒號動
地來波濤立江面如屋復如山拍天仍拍岸三日不
能休雲容更千變始疑江神驕出與風伯戰擁起千
里潮散作雪飛濺跬步莫能前有纜莫能牽又疑慢

爾神至此獲深譴亦自料平生忠信粗表見神既依人行豈不畧為援若謂神無私應物當普現胡為汴流船却乃去如箭而我獨滯留艤棹長江畔終日困飄颻使我頭目眩試取蘋藻羞更効潢汙薦再拜祝天公冀為開方便莫問往與來莫問貴與賤風靜波亦平一如所願庶幾舟中人彼此兩無怨

阻風又成數語呈江朝宗

平生航浙河不知幾往返豈不或滯留有時容幸免未

若此番來所向輒相反順水即值風便風還阻淺夜來
至奔牛一雨成瓴建妻孥笑相看陡覺雙眉展謂可使
及城假館少休偃平明風橫生吹我船頭轉咫尺不可
前安能達京輦客路固多艱我行亦太蹇何當歸去
來高卧青山遠一任雨兼風杜門都不管

和何倅遊鴈蕩

何侯富詞藻能賦兼能詩百篇輩李白十稔嗤左思搜
奇抉靈怪造化不能私每為山水遊錦囊隨所之鴈蕩閔神

秀鬼物潛司巖開林發幽隱肇自興國時高巖聳齒萃
列岫森瑰竒龍湫神光異龍鼻靈液滋天柱萬仞立水
簾千丈垂羨君沿檄來暇日遂遍窺興隨佳處發景與
高情宜留步欣有得過眼光如遺乘寒躡危磴躋險攀
樛枝雅有許詢興心形不知疲我漸動拘俗薄官方棲
遲恨君為此行不獲相追隨平生愛山心自視如調飢
尋幽儻有路初不問險夷幾欲老山間便將雲衲披頃
幸官是邑柴車日載馳列賢不暫捨游燕必於斯每欲

狀竒怪苦乏幼婦詞千巖與萬壑胷中徒自知別來歲
月久况復逢艱危茲雖值平時老大無所施今觀君所
賦妙境俱在茲慨然想雲壑應不謂我欺會當尋舊遊
重與同襟期

丁亥守當塗中夏有獻瑞麥者今日池中復得
雙頭蓮因成小詩以記之

嗟我百無能此身仍老矣濫此把一麾何以慰千里隴
麥秀兩岐池蓮綻雙葉斯事雖偶然亦為邦人喜

和許守巖桂

桂華燦秋杪造物氣所鍾清香遍十里不與凡卉同使
君雅好客携酒臨芳叢被花惱不徹一笑高堂烘花本
生月窟何事來樊籠疑是姮娥懶睡起鬢蓬鬆一枝欲
斜插誤落秋山中要須排日賞拚取百尊空莫待花
零落惆悵隨西風

和任司理賞梅

平生愛梅花嘗有花前諾花亦知我心臭味頗相若對

花輒痛飲席天地為幕常恐風雨摧有負東君託一從
隨宦牒但知寃民瘼動為官拘守進退非綽綽倒指三
十年無復有此樂每逢春信回長憶花下酌老來把一
麾亦欲強有作牒訟日裝懷朱墨苦紛錯忽聞花已開
枝頭開寒爵喜即領賓僚對花話離索邂逅却成歡清
談間諧謔勝賞雖未窮亦足慰寥落後夜霜月明尚可
理前約

和許守水晶蒲萄

珍果孰稱最靜中試旁搜白柰非時至赤梨經歲留廬
山杏萬株武陵橘千頭未若蒲萄美甘滑仍脆柔正當
三伏暑滿架走青虬繁子何磊落一一如綴旒我家得
異種潔白映林丘每笑棗與栗濫比千戶侯邇來事奔
走頗恨拋鉏耰持此贈夫子因復獻鄙謀他年堆馬乳
豈但供薦羞願以釀千斛永言資燕遊客來彌日醉應
不數青州

門外池內荷生雙葉

今朝池內荷一柄生雙葉傍人為我言喜事尚重疊我
老皆無用榮望久已絕偶有二婦妊行將臨誕月所願
生二孫綿綿傳世業

寄題楊宰清畏軒

古人貴慎獨舉世知者希末俗事誇耀常患不我知楊
子有雅尚傳家守清規折腰三十載不辭州縣卑猶慮
與衆異憂讒還畏譏開軒揭華榜却恐非其宜要當且
用晦處靜藏天機昔賢忌獨清此語非吾欺

題碧雲亭

累土創新亭本擬還舊觀或言舊亭庠視此纔及半我
方安樸拙豈敢事輪奐言念夢幻身終日困几案既未
許自如超然脫羈絆亦欲對江山時發一笑粲自從得
新亭頓覺百憂散亭前柳色新亭下荷花亂明月可坐
邀積雪堪俯翫凭欄送飛鴻千里歸一盼詩成似有神
酒行欲無算取次亦足樂胡為尚興嘆恨吾年已衰志
在不遊官何當歸去來終老湖山畔

次韻沈漕使寄和碧雲亭之作

衰年厭塵勞久念作淨觀奉祠還故山閱歲更過半草
草結茅廬雖無輪與奩水作綠羅衣山為青玉案自足
了餘生豈謂浮名絆牽從江上來去國同王粲既與猿
鶴踈還驚鷗鷺散公餘坐危亭四顧雲影亂新詩忽鼎
來累日飽吟翫洗我胸中塵宛如覩清盼信知隱侯家
句法有成算方今苦乏材當鎖屢興嘆如公人物英寧
久從遠宦會見御追風起自長淮畔

寄題鮑昌朝足軒

江南有散人幾年卧草野破甑餘塵埃衡門絕車馬倘
非義所安一介不取捨闢軒窮巷間此意非滿假雖云
外不足中有至足者道義輩古人文章播天下一點浩
然氣萬象資陶冶持此復何求酣歌對醖宰吁哉簞瓢
樂千古一回也先生於此時卓然秉大雅顧我愧高風
亦忝詩酒社何當登此軒抵掌共披寫

題生春亭

府治何偏仄幾不容欠伸我來撤敗屋池館為一新便有鳥喚客更多花惱人誰知牢落地一旦遽生春

題涵碧亭

幾年涵碧亭吾亦屢來往當暑既難逃斯亭尤可賞清照心膽寒涼侵毛骨爽我方困長塗且此休塵鞅

登遐觀亭

城上闢新亭似若規模小誰知此亭中景勝冠江表湖山既回旋煙雲仍縹緲萬象森目前不數花與草公餘

乘興來聊以散懷抱四時風物新一一發天巧芳春柳
色連長夏荷花繞月明固已佳雪積還更好凭欄認歸
舟策杖送飛鳥適意豈在大容膝自足了第我思故山上
章方告老指日是行人頗恨來不早

寄隱者

守道宋高士築室齊東鄙植竹看歲寒種田助形委
束書捐古今抱易究生死不以外移內不以行責止
九十留童顏湖山飽清視或顧先生云時平可以起

先生本無求棄置如敝屣俄聞與物化精一未嘗毀汗
簡書逸民義風洗貪士東望呈肺肝遙瀉一卮水

和陳國佐亦愛堂韻

紛紛當世士盡道休官去有墮塵網中誰能復回顧重
為軒冕惑一念遂差互要當發深省悟此形皆寓奔馳
徒擾擾靜中有奇趣夫子廊廟材華途昔榮遇富貴方
迫逐脫身一何遽蓋恐負初心或為名所悞獨尋陶淵
明三徑歸來處親朋續舊遊寢食安故步詩成月滿

窓坐久塵生履箇中有真樂自足慰遲暮我方困長途
因公識歸路讀公寄傲篇更覺忘世慮有如逃空虛傾
耳聽韶護念此有限身歲月空復度他如願卜築結茅
相近住如公邁往姿平生已心慕我雖負俗累胸中無
好句儻獲從後塵登高亦能賦

夏日同官會飲白鶴寺雙瀑亭李道濟作詩紀
事因次其韻

嗟予好泉石所至窮幽勝年來墮塵埃復苦炎熱盛賴

有古招提相去不步何時供燕遊庶以息喧競山僧
結虛亭瀟洒淨如鏡雙瀑從天來景物更幽迥欄楯溢
波光清涼殊可凭復幸僚友賢雅與山川稱得暇傾尊
壘相從盡豪俊令尹如子文去就亡喜愠貳邑不負丞
所蓄金玉潤耿侯固坦夷趙子亦純正盍簪已足樂况
復有名醞酒酣人意適坐久天宇靜踏月各言歸清風
遠相趁君詩繼踵來敏捷過於瞬中復含妙理不獨寫
幽興讀罷愈驚人癡坐不知暝援筆強續貂安能繼高詠

和王夷仲詠施粥

伊昔豈無旱赫日流金石伊昔豈無水巨浸連天白未
若去歲風飄忽幾終夕時方屬新秋稻子半黃赤倏然
卷地來一掃不遺力但覺田畝空不見倉箱積餘禍及
吾民來春有飢色巡門粥妻子不足充貴糴往往成流
離有家歸不得我方還里閭正值此艱厄有心懷拯救
不寐欲通昔念無捐廩人此意空憤激民饑猶已饑吾
寧忍獨食作糜倒瓶粟恨不及九百紂合族與隣樂從

有吾叔豈但一時利永作他年額要令里中人自此長
飽德雖或有凶年不復更他適鄭罕與宋樂未足為匹
敵施厚報必豐會須省他日

再和

嗟我性拙疎平生好泉石好景與良辰風清并月白必
對佳友朋一尊陶永夕雅志在輕肥每笑公西赤歲晚
効一官粗竭區區力所得僅牛毛罪戾如山積與其鎮
營營終朝有憂色孰若歸去來日作太倉糴雖然食不

充野性還自得況復二老人年來多病厄杜門奉旨甘
此意自平昔端欲務寬閒初非為矯激他日會稽歸斯
言終不食人誰諒此心交遊謾千百獨幸王夫子相知
如鮑叔憐我氣早衰短髮僅覆額信我非作偽有意在
作德餘生能幾何捨此將安適世路多風波談間起讐
敵且復倒壺觴樂此承平日

有感

陰陽失調變歲事成大饑我聞江湖間細民競流離療

饑已無食卒歲還無衣民窮聚為盜自古誠有之不謂
嚴冬日宛如暮春時里閭疫癘起災迭逮嬰兒今已歲
殘臘不見雪片飛中夜不能寐念此方涕洟上天復赫
怒雷聲震四維驟雨相繼作奔電仍交馳連夕不能止
遠近俱憂疑我心更驚愕倍畏天之威炷香拜庭下再
三為民祈願天正時令順行無逆施反雷變作雪盈尺
以為期庶幾宇宙內物物各得宜

和王澧州喜雨

田父苦亢旱傷心涕泗沱使君憫斯民零糈亦何多古
廟舞羣巫袂屬肩相摩密雲自西郊奈汝旱魃何天官
感精誠霹靂加譴訶遂協畢星好一洗吾民疴頓覺田
畝間歡然聲氣和人生一飽足寧復憂其他要當及豐
年對酒仍高歌祇愁偃鼠腹未醉顏已酡

和林大任上許守喜雨

退之訟風伯風伯罪固彰未若旱魃甚千里塵沙黃我
欲持斧鉞尸諸古道傍此志竟未就展轉成悲涼使君

金史卷一百一十五
有妙術在德非馨香神龍不敢卧感會趨靈場霈然下
甘雨天地森開張旱魃不待誅一旦自摧藏

機簡堂余里人也在方外三十年未識其面乾
道己丑余帥豫章乃自圓通來謁與之款語連
日忘疲不謂末法中有此龍象且喜余里之有
人因其歸作詩以送之

我家石井旁山水非不奇所恨過從少無與同襟期獨
幸里巷間高僧有二機大機傳祖印海內聲名馳晚歸

結草庵杜門人莫窺嗟哉已物化不見三十春我為銘
其塔世猶仰清規小機真龍象方為人天師宴坐一禪
榻天花零亂飛聞名亦二紀頗愧會面稀忽自廬阜來
訪我江之湄共說無生話不覺日晷移顧我麋鹿姿久
欲脫羈羈來日寧有幾擾擾將何為一點退閒心不謂
師已知祇俟及新歲上章力丐歸師儻還故里願言款
柴扉我雖無長物亦有筇一枝正欲穿林壑相與窮幽
微庶幾進此道盡洗平生非

白石道者棲於洪巖以石為糧先朝敬愛之賜
予之物甚盛一日主僧持來郡齋因獲恭覽嘆
仰之餘偶成拙句二首

高僧隱青山宴坐咀白石不知幾何年人猶訪遺迹顧
我頑鈍姿但知能肉食回首仰高風捫心有慚色

道人厭塵紛萬乘挽不住愧我未得歸見之愈增慕奎
畫儼若新真容宛如故舊隱雖寂寥山靈尚可護

和黃作霖白髮

白髮有公道古來人盡然我初未四十霜雪已滿顛黃
子我同歲比我還更賢時命未遇合退藏非自捐不須
悲晚景不須怨蒼天如君豈長貧時主方御乾

病中有感

大暑苦河魚久乃變成痢輾轉枕席間百藥幾盡試神
氣頓索然不止形容悴自謂與鬼隣偶然有生意方欲
少開眉赤目又為祟餘年能幾何十日不知味今雖強
支持下筋猶畏忌去歲夏到官今年又秋至默數一年

中安好無一二顧此衰病軀豈堪長代匱回首望故山
幸有寬閒地不如歸去來笑歌聊自慰

欽定四庫全書

湖山集卷三

宋 吳芾 撰

五言古詩

和胡經仲中秋

平生惡晻昧虛空光陸離心與此月同不容一毫疵恨
月有圓缺不得常清竒每欲語天公仍斫此桂枝青冥
去無路思慮空勞疲明知此意苦慙懃長我隨去年西
湖上爛醉吟悲辭今年巧相覓似欲叙離思西風為披

拂浮雲無蔽虧坐開百壺酒與月論襟期永結無情歡
謝此世上兒吾友胡夫子豪蕩笑墨釐擬借月顏色為
君鑒薄帷告之且痛飲行樂當及時

和閭丘莘叟中秋翫月

平生愛明月夜坐長忘眠每見冰輪上兩足先跼蹐清
賞意未足常恐雲油然老來有餘興猶不減少年今歲
值秋半一醉擬留連無何山雨來不見觚稜圓尚意閨
餘夕百分棹觥船居然遂此願使我喜欲顛引滿對清

影席地仍幕天豈知賢伯仲亦愛此嬋娟與我嗜好同
清夜聳詩肩此景已買斷初不用一錢况復有佳句還
與月爭妍愧我無好語濫繼聯珠篇

酒為偷兒所竊

我性苦拙疎與世不相偶平生不如意徃徃十八九何
以遣此懷賴有樽中酒去冬釀碧香頗不計升斗準擬
與親朋興來一聚首庶幾牢落中時時開笑口偷兒何
好事一夕負之走可惜數十壺化為一鳥有昔聞韋秀

才有酒盜不取今我乃致寇退省良可醜無乃造物者
知我踈慵久恐我醉時狂未免自遺咎用此警昏迷意
在鞭其後顧我雖無知自愛豈不厚從今誓改圖停此
傳盃手炷香捧茶甌閉門清自守坐對古聖賢永作忘
年友

和董伯玉不向東山久韻

讀書想前人徃徃得師友每愛釣渭濱頗喜耕谷口夫
豈與世違甘心卧巖藪升沉自有時此意君知不

野外小過從出門欲何向所幸得夫君相與樂閑曠年
來既倦游老去那病忘且復對酒搏尚須時一訪
我暫出山去常憂蕙帳空聞君東山樂愛君古人風日
暮君不來碧雲蔽高穹凌晨戒僮僕駕言將徂東
塵緣嗟未斷俗事頗相關雖懷林下趣坐失山中閒時
令清夜裏夢繞雲水灣寄語猿鶴伴明朝歸故山
雲氣滿戶庭嵐光入窓牖是有佳處不出吾座右邇
來獨何事未免跋跋走三讀寄佳篇臨風嗟嘆久

和王朝議韻

晚日轉雲頭長空收雨脚稍覺暑氣清獨坐傾桑落興
來或醉吟接羅還倒着胸中了無憂事事俱脫略緬懷
我友朋蹤蹟東西各幾欲徃從之恨被微官縛此來得
夫子臭味頗相若傾蓋便論心開懷不我却新詩一何
工清思渺寥廓才如李杜雄句壓曹劉弱顧我志意衰
筆力不如昨明時百無用正恐填溝壑公餘幸少閒對
酒且深酌拭目看諸公衮衮登臺閣

和樓大防韻

嗟余本何人，纍然居海嶠。家世業為農，有田在巖窵。春
到耦妻耕，寒來從母漂。屋角日誅茆，杖頭時荷篠。迨冠
知讀書，聊為起家兆。有琴既無絃，有劍亦無鞘。僥倖廁
末科，安敢綴天影。但期竊斗升，活此老與少。豈謂暮年
中，亦誤蒙收召。曾未著微勞，遽使登華要。自度老無能，
共知愚不肖。縱未遭人非，難逃天日照。儻不速休官，寧
免淵明笑。矯矯淵明賢，千載誰能紹。瓶粟雖無儲，風標

松北峭詩篇雖不多筆力天與妙顧余豈能詩微吟蚯
蚓竅可笑不自量輒欲賡高調貳車真豪英逸如千里
騾又如禮樂器肅然在宗廟有美頎而長視容清且瞭
自應轉明時與國增光耀胡為佐一州從容陪坐嘯乘
興來湖山欲看余把釣濯足翫水雲縱目觀野燒喜余
和陶作舉杯為余醕草具雖蕭疎亦復為余嚼余已學
淵明公方跂周召出處既不侔無由遠相呌願公保令
名求賢行有詔

二月晦日惜春有感

春半年已除舊聞詩人語老夫始信之倍覺傷時序方
春未來時屈指朝朝數十分擬春來欲與春為主那知
事已乖十日九風雨縱得暫時晴應酬紛萬緒舉眼看
校頭春事已如許還憶故園花連年成間阻南園亦可
人雖美非吾土願天早放歸容我老農圃月下與風前
對花歌且舞日日是青春何必唱金縷

春半年已除其
餘強為有杜牧

之詩
也

送春有感

物物俱有情情尤鍾我輩况復病且衰白髮不相貸今
日送殘春倍覺生感慨正恐明年春此身不復在憶昔
少小時逢春便傾蓋五十六年中相親復相愛春雖自
天來祇在花叢內常憂地不寬栽花容有礙買山敢論
錢惟恐力不逮花開即欲看花好還須戴詩必為花吟
酒必與花對醉則卧花間豈事形骸外醒復繞花行視
之過粉黛從人笑我狂我作童兒態自云盡此生與春

長相會人事苦相爭花謝春亦退我欲苦留春春去不
少待為春攪離腸寢食俱忘廢悲來不可禁未免歌懔
慨我當保餘齡相見猶可再若或徑溘然遂成永分背
願春略躊躇一樽容我酌

憂居杜門久廢筆硯茲因卜築輒有所感不免
破戒作數語呈諸親友

平生事幽討性與山水便晚歲闢三徑頗喜得地偏遠
不去桑梓近與松楸連青山枕其後流水繞其前羣山

更簇簇左右相周旋棟宇雖未立氣象已足觀旁人笑
我拙空囊無一錢何苦欲架屋作此煩惱緣我豈不自
知老去將終焉游居與寢卧安可無數掾人生七十稀
自古嘗有言我今五十七髭鬢已皤然縱使此身健前
去能幾年仕宦雖齟齬亦復忝蕃宣向來為親養猶或
強着鞭今既成永感前事都棄捐儻或未死滅誓將老
林泉遂此卜築志閉門日高眠栽花滿我屋種竹環我
園山上創一堂湖中具一船從容與親舊取次中聖賢

雖無萬鍾祿雖無二頃田
胸中富丘壑眼界飽風烟
自足了一世此外休問天

再和

嗟我推鈍姿處世百不便
性獨愛山水固非嗜好偏
本來中山人家與青山連
仕宦三十載塵事雖滿前
登臨興不減佳處輒盤旋
搜奇更探勝往往窮游觀
所恨坐艱窘苦乏買山錢
年來足憂患杜門絕世緣
百念俱不起此心已休焉
尚欲對山水茆茨架短椽
非為求安計

蓋守知足言如我百無似自視仍闕然餘生亦何幸獲
親中興年賢能隨任使熙運逢周宣退量駕鈍姿老去
難加鞭有如不才木偶未溝中捐寧復幾寒暑白骨埋
黃泉且趯此身健飽食仍醉眠衣葛謝軒冕杖藜守丘
園朝躡登山屐暮上泛湖船保真師古語樂聖繼前賢
有妻能執爨有兒能力田萬事不介意過眼如雲烟無
榮亦無辱庶以全吾天

久雨

歲旦值庚午已有旱暵憂甲申與丙子仍更雨不休豈
惟主夏旱還慮麥不收農占吁可畏使我生春愁我今
安靜退身外百無求止願年穀熟高枕卧林丘時時與
親友尊酒相獻酬天意今乃爾一飽未易謀衆人憂餓
死我能獨樂不念此不成寐中夜涕泗流無所用吾力
止望天賜休天不絕民命會見大有秋

送董伯玉造朝改秩

之子久言別今秋忽此來訪我湖山上連月相追陪和

詩動盈軸舉酒必盡壘使我增眼明頓覺忘衰頹方將
走山谷乘興共尋梅一笑坐花下覆此黃金杯俄然告
我去遮路挽回匆匆陳祖席再豁懷抱開自古論治
道常患無人才如子雖寒素萬古稱賢哉時運偶未至
半在困塵埃從今脫選調寧復嗟淹回會見日千里騰
躍如龍媒願言更努力聖主方築臺

丙戌送春有作

三月三十日春去人盡惜我獨惜春多欲留春不得憶

昨仕行都亦屢逢春色王事多鞅掌常苦無暇隙擔上
看桃李負春長歎息每欲早歸田恨不生羽翼及至今
得歸亦復少歡適平生無室廬方且事工役老妻病累
年年來覺轉劇百事總關心十日九不懌把酒對東風
一春能幾夕因念夢幻軀處世不滿百今日六十三已
是桑榆迫縱使到七十能得幾年客幸春有舊好一笑
常莫逆今既舍我歸動是經年隔聊復倒離樽與春話
曾臆我方葺園亭隨分足泉石準擬共東君着此幾兩

屐丁寧春早回莫使長相憶今宵已拚醉坐待東方白
明旦各分飛斷腸芳草碧

和送春詩送陳澤民

少年買青春千金初不惜常恐春不留韶華難再得種
杏更栽桃為春添景色對酒復當歌與春亡間隙春去
或未來日探春消息及至春又歸送春恨無翼追隨九
十日無日不自適胡為把一麾千里從吏役當塗古道
院事簡非繁劇宴坐對江山亦足自怡懌所歎乏游從

無與共良夕陳侯有高標鷺鳥空累百落筆動成篇端
不在促迫不意牢落中乃得此佳客人事苦參商天意
有順逆笑言猶未竟遽爾成乖隔雖未唱陽關別恨已
填臆此邦固寂寥頗亦富水石方擬出郊坰共試登山
屐何事逐春歸不念人相憶春事雖已闌殘花尚紅白
且復引離尊倒此香醪碧

答客難

我治湖上園占斷山水窟幽事日相關頗覺無暇逸有

客來相過云欲救我失謂我雖愛閒未得居閒術衆人
役利名公獨役景物固與衆人殊未免俱汨沒孰若淡
無營燕坐一虛室百念盡消除百事付真率物來則應
之豈可自撓拂客言非不忠我意客未悉萬法仗境生
百果因花實我聞洛陽城名園渾比迹至如司馬公樸
素世莫及有園號獨樂晚歲亦加葺人心固不同豈能
盡如一顧我病且衰行年將七十光景去不留餘齡那
可必要當且逍遙樂此桑榆日寧如土木偶終朝長兀

兀況有佳山水茲焉久蟠鬱地靈盡發露一旦為我出
若不一領畧無乃太拘執何妨几席間時與相顧揖擇
勝把酒杯搜奇入詩筆猶恨景物多未能盡收拾他人
視若忙我心常自佚人無所用心先聖每忿疾既不學羣
兒詫仙仍佞佛不有博奕乎為之猶勝弗客既聞斯言
語塞幾若訥因為客書之聊以誌髣髴會須畫成圖繼
取王摩詰

聞同庚不幸有感

我生甲申歲同歲有幾人十中無一在使我涕隕巾嘗
試屈指數誰登要路津不過五六輩蹤跡半已陳其一
最先達進為國大臣寵榮無與比近亦以訃聞顧我何
為者本是隴畝民持橐已過分壽更近七旬獨恨苦拘
縛歸志不得申天復放我歸遂此自由身湖山堪寓目
風月足怡神有花我共醉有鳥助我吟若不自娛樂開
口對芳辰却恐泉下客笑我浪苦辛雖生亦何益徒負
百年春

和陳天予卜居二首

夫子有直氣聲名重於山上書遭放逐去國知幾年傷
弓念投林失水思潛淵但期歸里社問舍仍求田迨茲
是卜築占勝郊野間梅竹映左右溪山繞後前且欣輪
奐美碧瓦生青烟莫嘆經營苦綠鬢成華顛君雖欲退
處天豈容久閒會起佐明主四海俱晏然

我亦初卜築止有湖與山一區未易就首尾八九年種
竹已成林積水已成淵我始得棲息守此桑麻田羨君

治第敏不出數月間落成寫胃臆遙寄到我前佳句繁
珠玉妙畫梯雲烟我見為君動喜甚殆欲顛第恨隔山
嶽無由相伴間何時一會面尊酒共陶然

湖山遣興

我在小西湖浩渺仍清曠大旱未嘗枯久雨亦不漲灌
溉數千頃無欠亦無長中有十里荷花開密相傍疑若
水仙遊波間張供帳既列萬紅粧復陳千彩仗風細月
明時天香互飄蕩縱有老畫師丹青難髣像我心如死

灰萬事俱廢忘獨於此留情曾不忘一餉日日繞岸行
踏破屐幾緡無以寄幽懷誅茆聊小創開牕面湖光納
此無盡藏冀得日臨賦少效陶元亮用以償素心庶不
孤雅尚每自謂生前足可供酬唱偶未脫世緣一出成
牽強紅塵四十年白髮三千丈勞力復勞心時時嬰拙
恙夢寢到湖邊恨無縮地杖迨今始歸休掛冠老湖上
坐看水中天依然涵萬象近樹與遠山倒引還彌望驚
湍瀉兩閘飛瀑來千嶂沙頭鷗鷺集水面龜魚漾似認

舊主人有意來相向時方夏初臨雨霽天風颺日影烘
微雲水紋生細浪徘徊至夕陽迤邐扁舟放恍覺此身
輕有如在崑閬我病雖不飲亦為傾家釀酒酣逸興來
懷抱益舒暢嗟我本寒儒百種無一樣晚有田與園所
得已過當今更享此湖重慚踰分量是豈人之力無乃
天所貺惟是頑鈍姿年衰多俗狀塵痕滿衣襟攬鏡空
感愴要當盡洗濯見我本來相心跡喜雙清從人詫官
况

紀夢

平生好山水至老心不移每聞有佳處欲見唯恐遲相
去雖云遠不憚脚力疲縱不能得到夜夢必見之晚歲
卜築地一半在翠微山水既俱勝景物還相宜旁人來
觀此已自心目怡若乃夢中見則又遠過斯高山與流
水到處皆崛竒其間有樓觀金碧仍相輝幽深極險怪
皆世所未窺謂必神仙窟非世所得知不謂我凡骨乃
獲來遊嬉恍然若驚覺有如天上歸是豈造物者不與

人相違知我有雅好特以此見貽嗟我今老矣萬事都
棄遺猶有山水債未能忘夢思他日或蟬蛻百態不願
為只願海山去赴我赤松期

機簡堂自隱靜歸為萬年主人訪余林下相與
道舊因以述懷

吾鄉本仙窟石井尤奇特民物生其間古來蓋千億惟
師與我家所居共阡陌少小初無殊長乃分儒釋術業
雖不同於道俱有得師為方外遊聲價已籍籍象教久

衰微賴師振業席韁韜與鉗鎚信有彌天力果續佛慧
命作大善知識我雖登禁涂無功亦無德但有憂國心
徒勞竟何益掛冠歸林下面亦無慚色知心獨有師相
視笑莫逆每思共談玄傾倒此胷臆江浙遙相望恨不
生羽翼昨朝忽惠然得得訪泉石一見雙眼明歡喜幾
折屐第念我與師彼此頭顱白世路方艱難老去合休
息師既歸故鄉不應復他適願言却世緣來伴我幽寂
相看成二老永為閭里式

杜子美寄贊公詩云相看成立
二老來往亦風流

葉性之有詩紀十五夜之集因用來韻

人生重行樂樂事古難全有如天邊月多闕還少圓又
如牛女星會合動經年今夕羣賢集定知非偶然顧我
老多病要路懶着鞭年年上章疏只丐早歸田賴天憐
此意得遂性所便歸來小西湖湖水清且漣吾廬在其
上可濯仍可浴一望興無盡十里開紅蓮風前波渺渺
雨後竹娟娟到此百念滅已是卜終焉但恨乏勝侶使
我心懸懸今得與公輩共上泛湖船載月娛清夜同醉

壺中天雖無管絃奏雖無羅綺筵看此水與月自足中
聖賢况復座上客盡如珠玉聯其間有老匠自舊稱詩
仙飲散出佳句為我寫由拳紀此一時勝付與山水傳
合當風月夕更結一笑緣

家人生朝

相從四十年於今成二老向來苦宦遊頗恨歸不早我
家枕湖山髣髴如蓬島今始得歸來方喜開懷抱復值
君誕辰滿目春光好幸有酒千鍾足可共傾倒要須且

沉酣莫被閒愁惱我方務清虛志不在金寶亦復戒浮華意豈在花草但願享遐齡白首長相保

生朝偶成

今晨是生朝今夕是除夜年年聚親朋往往羅酒炙而我忽抱病見酒輒避舍一滴不沾唇何以相慰藉人生能幾許今已迫衰謝病軀復如斯令人發悲咤展轉竟無眠作詩訴同社

送津兒之官麗水

憶我初仕時不敢望高位但得宰一同便可行已志實
惠儻及民死亦有生氣况復著陰功子孫將不墜胡為
人憚之百計欲求避我聞事無難辭難豈為義世路雖
多艱官塗須歷試是用俾吾兒往當民社寄眷言古括
州山水有佳致我尚記昔年嘗為郡守貳雖無德在人
人亦安平易百里聞汝來想見多忻慰要當盡此心有
以塞其意誠能使吏民自此知懷畏家家各安居人人
共稱治縱或罹謗傷固自有公議有如汝所存俯仰似

無愧功名餘事耳何必成與遂年來我掛冠方得閒中
味無奈逼桑梓七十仍有二知復幾何時得見汝娛侍
雖幸枕湖山已闢幽棲地有詩誰伴吟有酒誰同醉正
欲汝相隨俄然又相離會須早歸來日作斑衣戲箇中
有真樂豈必三旌貴

子與王瞻叔韓通一林梅卿余知默徐彥才六人
皆同庚也一登政路五上禁塗其四久已物故
所存者獨知默與予耳今日得報知默又已云

亡念年齒至此予亦豈久於世者乎悵然有感
於懷因成數語以自解

同庚非不多達者能有幾七十二年間六人而已矣其
四迹已陳止予二人爾今朝聞訃音其一又不起嗟予
獨何人偶爾未見鬼自度如許衰寧久紅塵裏念此夢
幻身誰能保終始失者雖或非得亦未為是死者固可
悲生亦不足喜幸然已掛冠萬事不到耳何妨日凭欄
樂此佳山水仍更日開尊賞此新桃李時時命歌童唱

金匱要略卷三
箇陶真理倘或未溘然亦足娛暮齒

病中有作


吾年七十五一朝忽患瘧仍害及老妻對床更撼鐸寒
時寒如冰熱後熱如灼既去還復來如與我有約連日
莫能休盡室皆驚愕飲啖一不忤形骸頓如削細思豈
無因良由賦分薄本是農家子只合事耕作既已得美
官復有歸田樂已是無福當又不知慚忤遂至瘧鬼憎
故意來相虐作詩告天公縱我有過惡願天少垂憐疾

痛且濶略但速賜之死莫令我知覺一生纏世網正欲
解其縛假使壽百年寧免此一着不如早歸藏且免論
強弱我非畏死人久已辦棺槨

述懷

我愛白樂天千載共稱賢行年七十五奄忽遂溘先我愛
范忠宣一代名德全年齡甫至此亦復成棄捐二公雖
已逝四海至今傳顧我百無事幸及二公年今夏疾疢
作已分歸黃泉偶然得無事固荷天見憐但我有一語

恰欲與天言有生則有死如行者言旋我是久行客亦
自應息肩念人處一世動為世網纏開口罕歡笑觸緒
多憂煎縱使至百歲終困塵俗緣不如早冥目庶以全
吾天是非與寵辱揔不到我前一心亦安靜却得返自
然况我辦歸計久已卜新阡



欽定四庫全書

集部

湖山集卷

四至
六

詳校官庶吉士_臣柳邁祖

主事_臣呂雲棟覆勘

謄錄監生_臣李光緒

謄錄監生_臣陳祁

謄錄監生_臣沈霽

欽定四庫全書

湖山集卷四

宋 吳芾 撰

七言古詩

里有蔣生者頗志於學迫於貧困吾叔德先見而憐之贍其有無使從胡經仲學作詩勉之

君不見昔日泰山孫先生蹭蹬窮途道未行讀書有志破萬卷置錫無地可躬耕高堂親老仰甘旨未免道路長營營睢陽客舍一再過牢落誰人知姓名文正范公

真好士一見賓階喜氣形深知先生非乞客金在泥沙
玉在荆底事窮年事奔走厄貧廢學誠可矜因留鄉校
周所急奉親為學使有成先生果不負公望行益修兮
經益明十年聲名動廊廟天下望之如日星一代儒宗
君試數誰不首以先生稱向使不遇文正公亦將因循
埋沒如腐螢吁嗟此風寂寞久豈是畎畝無如先生之
才能世人俗眼棄貧賤胷中壯氣空崢嶸吾家叔父特
達士汪汪偉量如滄溟比隣有蔣生所志在窮經迫於

飢寒故無以贍親庭不問師道已未足聚訓青衿已十
齡銳志日已喪塵事日已嬰顧雖僅能供子職而此術
業何由精吾叔念之為慨然一見自待如父兄恐子坐
窮竟廢棄亟使就學趨韋繩況有括蒼胡夫子傳道吾
里作世程執經座下子無忽子之所須吾其應傾困倒
廩略無靳濶視世俗親疎情我聞此事猶歎息俗士聞
之應駭驚近來世道太澆薄骨肉猶作錙銖爭故雖有
子尚不教但欲黃金自滿贏安能推其餘以及異姓忘

愛憎偉哉吾叔賢遠繼文正公之英聲蔣生其勉之無
使後人獨羨孫先生

續潘仲嚴秋夜歎

秋夜涼秋夜涼碧天如水涵月光空堂耿耿不成寐起
坐拔劍歌慨慷歌罷金樽還獨酌試一停杯問寥廓此
身此世竟如何搖搖驚燕巢風幕伊昔我生適太平豈
信中原有甲兵揚鞭走馬長安市美人如玉酒如澠可
惜太平留不住一旦風塵香回互誰知年少樂游場翻

作敵人爭戰處烽火照天光奪日殺氣騰空暗如霧皇
家骨肉幾千人盡逐鑾輿沙漠去回頭宮闕成一空惟
有山河在如故咄咄姦諛何誤國二十年來啟邊隙邊
隙已成猶自如忍使吾民罹此極哀哉吾民亦何辜父
子連年死鋒鏑興言及此心膽寒空對秋風淚橫臆淚
橫臆宇宙回旋雲失色我聞古亦有亂離人道亂離今過昔一
人厭奔走四海念休息如何廊廟土木人安坐恬然有
肉食我今願得上方斬馬劍盡取兇徒肆誅殛却總堂

卷四
堂百萬師淨掃邊塵空塞北莫言草芥無奇策願蒙天子一前席

和林大任勸耕

壯哉溢目還盈耳千騎出城歌吹起野人一覩快爭先
奔走歡呼幾折趾往年戎馬偶出郊田間彌望皆荒茅使
君篤意勸農課盡使情游如所教麥欲連雲桑蔽野此
心猶恐孤民社要將治績邁龔黃不但文辭超賈馬編
民擊壤自欣歡盡道年來百慮寬承流宣化得賢帥湛恩

霑溉何漫漫不愧剖符仍受玉善政已為千里福年豐
穀賤復何憂向也窮民今亦足固知博施非必膏況能
好善如千旄賓僚倘有公輔器寧辭解贈腰間刀有客
有客歌賢業詞爛春葩光煒燦一時酬唱已清新四坐
朋從更和叶酒酣諧笑應云云元白李杜疑前身想當
揮毫落紙時筆端往往俱有神我來觸緒未暇給首覩
明珠千百粒豁然兩眼頓增明更覺慢心無自入已幸
從今日往還况復賦詩賓客間只恐使君丹詔下擢歸

青瑣點朝班

又勸耕

浙東十載歌豐登去年水旱俄相乘
吾州何幸得一熟四野絕聞愁歎聲
田疇二月土膏動樹頭布穀爭飛鳴
田家飽食苦無事雨後一犁方對耕
敢意使君親勸率千騎曉作田間行
老農感激前致語使君不用憂西成
臘中昨已見三白今日還逢甲子晴
年豐穀賤定可卜倉箱會見如坻京
但願使君對春色莫負花前雙玉瓶

人生適意未易得
况復時節遭昇平
要須拚與賓客醉
無使旁人笑獨醒

喜晴

我家世業本農夫
力作耕田供百需
食無魚兮出無車
但守桑梓依粉榆
中更兵火田園蕪
燕骨肉奔迸幾為奴
飢腸雷轉寒侵膚
中夜窮鬼常揶揄
自笑為生亦良劬
此身何由出泥塗
始棄耒耜親詩書
一以經訓為蓄畬
兄弟相繼躡雲衢
吾鄉往往推諸吳
我雖有志徒區區

顧慚小技非大巫向來聊出應時須亦復接武丹陛趨
退視才慳思且枯敢意濫吹東郭竽自從得請歸田廬
萬事閉眼不問渠豈謂割分姑熟符一時之使偶見除
此邦自昔稱膏腴千里舊富稻與魚十年九潦田無租
今歲擺極方滿圩邦人舉首爭歡呼謂此豐登亘古無
驟然一雨驚里閭直疑平地浮江湖靈祠致禱纔登輿
已見皎日升東隅一方今既奠厥居太守寧不欲自娛
便可投綬歌歸歟

癸巳歲邑中大歉三七姪捐金散穀以濟艱食
因成三十韻以紀之

吾家謂姪非常兒自幼讀書常下帷平居事母盡孝道
力供子職曾無違辛勤農畝三十載頓立門戶成家肥
耻同流俗事驕吝好賢樂業常怡怡聞人急難如在己
見義踴躍無不為造橋砌路未為德折券釋逋未足奇
究其存心用意處尤在邑人艱食時此邑山多土田少
民貧自昔難支持其間歲收數百斛已為富室他可知

况復今年苦亢旱州里遠近咸告饑田疇彌望總如燎
細民未免俱流移縱使人能保常產亦復有甑無米炊
雖幸朝家行賑濟正恐未能徧羣黎往往傾村走山谷
荷鋤掘地尋蕨其取根為粉雖可飽食之既久人亦羸
春來必至生疫癘死填溝壑夫何疑吾姪見之軫憂惻
首議倡率輸家貲既捐青蚨二百萬猶恨糴貴難療飢
庾中僅存二千石一旦傾倒盡散之此心但欲濟隣里
身外浮名非所希吁嗟薄俗務貪鄙計較升斗爭刀錐

徒知富有可潤屋豈慮人怨親戚離有如吾姪為此舉
吾鄉自古應亦稀小惠所施固未博風義自足洗澆漓
儻使人人皆若爾千里豈復憂餒時第願吾姪廣此意
所為盡從今日推陰功在人天心報會俾爾壽膺繁禧
梓里遺芳傳未艾世有子孫攀桂枝豈惟同里共歌艷
亦使吾姪增光輝老夫無以示旌勸聊為吾姪題此詩

和向巨源冷語

長空一夜飛瑞葉正是人間苦寒月靜坐遙聞修竹折

天慘雲愁風更冽喜君試水烹春雪却笑酒酣長耳熱
又

風掃千林無一葉獨有疎梅浸霜月欲御瑤琴愁指折
試酌寒泉驚齒冽最愛閉門人卧雪不作羣兒附炎熱

釋奠于學和劉判官韻

憶昔未冠隨親庭采芹曾挹泮水清仰高先聖空有志
逮壯纔能脫白丁三釜及親雖可喜抗塵不復論書史
舊遊恍若一夢中十載何期兩來此慚無善政及邦人

況負平生道德心再瞻廟像直汗下正恐不為神所歆
朝來俎豆敬通靈幸賴賢僚贊禮成更勤佳句愧盛意
敢與前賢齊令名詞場自顧非元帥白髮星星徒滿戴
尚期君與振斯文休嗟蓮幕淹三載

朱世同喜雪中得酒出佳篇相謝用韻奉酬

吾子一布衣抱道仍懷德人雖仰其高耐寒如松柏亦
復誚其介忍窮如鐵石欲耕且無田欲住且無宅借人
茆舍居破漏無遮羃兀坐懶掃除凝塵常滿席文章老

更成初不事雕刻間為場屋遊往往遭棄擲進取既不
諧資身又無策數學三十年嘗作離鄉客亦豈無六親
為親成間隔亦欲求知音無奈俗眼白不知何所負半
生罹此厄空讀萬卷書不得稽古力昨朝起開門雪深
平地尺極目望四郊萬里如一色窮人盡皺眉共畏寒
威逼亦大不能堪君獨無戚戚危然書牕下哦詩度朝
夕我送一壺酒酒面蛆浮碧但可澆愁腸豈足資歡適
君乃走長篇再三叙感激筆下有如君足為人楷式勿

謂道難行自古有通塞時來會見上通津莫憂計拙無
衣食

和劉判官喜雪

濫把州麾奉北堂自慚政術非龔黃年豐物阜天所賜
容我養拙山水鄉今朝瑞氣俄融結散作飛花應時節
萬家疫癘一掃除盡道年時無此雪幕中佳士欣得公
筆端能與造化通乃知氷柱有家法寡和未饒歌郢中
一望瓊瑤迷四境我復白頭臨絕頂要須相與作春溫

共向尊前拚酩酊

詠海棠

古人花譜名浮實獨有海棠真第一我家千樹足奇花
晚得此花尤傑出每逢春色鼎來時爭逞新粧媚晴日
渾如酒暈入香腮宛似胭脂施玉質雨後妖嬈倍有情
天然富貴曾無匹夜深燭下更端相睡起還疑春思鬱
老來百事盡疎慵頗喜與花時款密豈知牢落向江城
驟爾乖離心若失試從僻陋強搜尋偶得一株天所乞

纖枝雖瘦不禁春亦有花光相照拂一時遊子覩爭先
共歎凡花難跂及愈令倦客憶故園不覺淚沾衫袖濕

對海棠懷江朝宗

我住湖山歲月賒年年長醉海棠花憶昨君來花未放
却言花放定相過亦欲花間同一醉肯教垂老負陽和
東風始動花始藥君已翩然到我家意君為花必少駐
那知事復成參差眼底垂絲先弄影一時浮艷亦堪誇
豈若神仙真態度紅粧翠袖肩相摩躊躇花下不忍別

回頭彼此奈愁何
匆匆直向剡溪去
急為飢民救札瘥
萬人既欲全性命
賞心樂事自應那
待得明春來修好
因循又恐成蹉跎
世間萬事無不爾
不用逢春苦歎嗟
如君年年走塵俗
深疑天不付芳華
何似相隨林下住
共將爛醉為生涯
不但有花供笑語
還應有句助吟哦

王若夫謂水晶蒲萄本出其家求詩

君家蒲萄天下奇
奴視百果何其卑
種成滿架日蕃衍
清似水晶甘若飴
八月江南風日美
正是人家酒熟時

盤中珍果有如此誰數閩中生荔枝鄉人歌艷競分種
不過數年條已萎胡為君家植此樹閱歲數十如新移
我聞尤物天所靳盛衰頗與人相隨君家令祖有賢行
一邑遠近人爭推少雖失身事刀筆吏之操術皆耻為
處心積慮人莫及奉法循理古亦稀人與黃金目不視
身居暗室心不欺退處郊垞忍窮困只教子孫為布衣
天公無以表純懿特以此果先見貽其孫努力効儒業
表表穎出非常兒未壯果能立門戶直上蟾宮攀桂枝

自餘雖未登上第亦已飛鳴到禮闈俱傳清白守家訓
端若此果光陸離今君既取以餉我又復琢句形聲詩
願君採折多醞釀積千萬石為酒池客來自此酌不竭
永永百年供壽卮

和陳天予巖桂

乞身未遂歸巖谷滿面塵埃慵澣沐鈴齋獨坐更悲秋
喜見吾人駐車轂吾人別久正懷思一旦渴心還慰沃
天公助我作清歡特遣仙花薦芬馥萬枝瑣碎屑黃金

幾樹陰森攢碧玉天然風韻月中來頗鄙人間桃李俗
秋高氣爽人意佳衰病無悰惟我獨胡為却被此花惱
盡日簷前看不足况是欣逢磊落人遠追渭釣并巖築
須知天欲長吟哦使向筠陽看修竹見花落筆作長謠
燦若珠璣千百斛我方觸緒不自聊得此細看還熟讀
明朝人去花亦殘只把新詩時反覆

得家書報敝居紫丁香盛開悵然有感

我家丁香大盈丈天公靳惜非凡材去年花開香滿屋

我方局促纏悲哀準擬今年必無事儘可花下相追陪
何期頗與花隔絕斗粟牽從江上來前日我家寄書至
為報堂前花正開熏人已如蘭麝噴照眼還若錦繡堆
狂蜂游蝶自來往舊成蹊處今生苔主人有花不解賞
向來何以事栽培置書不覺雙淚墮人事好乖如此哉
嗟我行年近六十鬢髮星星心已灰縱使從今得自便
此生看花能幾回况復奔馳未能已斷蓬正滾風中埃
欲往一見尚不可敢望近前持酒杯須知軒冕儻來耳

不如歸去山之隈

病中秋香開因成拙句呈諸親友

仙姿元自廣寒來分得天香長馥郁千古風流獨占秋
一枝曾比崑山玉伊余老去百念灰已是形骸如土木
年年尚為此花狂有似淵明偏愛菊坐中不可一日無
又似子猷真愛竹一從秋到天宇清頗費夢思眠不熟
凌晨便起探花枝走遍荒園常僕僕可怪司秋失故常
時節已深花尚伏迨余抱病卧匡床始報枝頭綴金粟

折來三嗅忽悽然不覺淚珠懸兩目天胡祇賦惜花心
不容享此看花福今年疾疢已如斯來歲衰頽還可卜
縱令牽強到花間空使此心生不足不如等是趁西風
把花一掃還空谷

陳正卿示蛤蜊解嘲之作因次來韻

夫君雅志知誰會身在寰中心物外平生初不入州縣
一任傍人驚且怪日來杖屨忽相過為我踏破松陰碎
疊疊清談頗逼人祇將萬卷窺千載得酒歡然竟不辭

右手持杯左手蟹夫君真是人中豪寧比尋常庸俗輩
不食蛤蜊何足羞但能適口斯為快山肴野蔌亦自佳
豈必蓴羹與鱸膾

復次韻

老來絕意風雲會久欲脫身塵垢外有時偶被世緣牽
吐吐書空常作怪一麾何事到江城却犯喧囂親瑣碎
簿書叢裏度光陰倏忽已驚踰一載所幸連年值有秋
頗足稻粱富魚蟹正愁客少無與娛忽得詩流真我輩

劇談終日坐生風洗濯煩襟一何快酒行到手君莫辭
有醜可魚魚可膾

中秋會於照水堂竟不見月和劉判官

又是人間八月秋西風萬里殘暑收簿書汨沒日復日
忽逢佳節聊舉頭開樽喜有賓僚共準擬延月歸城樓
姮娥何事苦相惱使我珠簾空上鉤百年樂事能有幾
興來不憚秉燭遊雖無月華助吟賞須知節物不可留
尊前莫問漏聲促且對溪山倒玉舟

九日感懷

淡雲籠日秋容薄
浙浙西風度簾幕
籬邊黃菊自重陽
天外幽人正離索
登高那可望
長安記得當年醉豐樂
十千美酒一百分
脫帽狂歌恣歡謔
風流坐上盡英豪
醉倒不知紅日落
誰知陳迹轉頭空
漠漠烟塵暗京洛
又是秋高塞馬肥
萬國城頭悲戰角
對花強飲欲忘懷
萬感並生還作惡
河水之濁有日清
世亂當復見太平
只應人老鬢毛疎
愧他年少挿茱萸

臻公釋氏之秀者浮游徜徉跡接天下乃者歸
卧雲山閉門不出遂命齋名曰戲鯨真得古惠
師之遺趣也予喜其志因留二十韻以贈之

吸盡百川還見底頭角驚殺鱸與鮪有時大瞋明月珠
照耀六合光不死滄溟浩蕩極遊巡鉤深匪憚窮涯涘
今者修鱗何側倚豈是吞舟厭遷徙祇應噴浪雲日翳
故此盤桓良有以朝發夕至固無難在在處處期一視
苟容肯向尋常溝要養此身數千里圉圉洋洋信自如

涵泳嚙齏真得理從容詎止濠梁游枯槁寧同車轍裏
至樂元非惠子知入舟肯作周王美謫仙跨背應無由
昌黎鱸鮑誠虛擬終日相望誰得似井蛙安足為跨跼
得所一任笑獼獼旋體寧容啞螻蟻清波孤虛有餘澤
何必龍津誇鋸齒叢爾鰥鰕徒唯唯春來秋化無暫已
隨陽上下一何勞風波蕩薄不自止警乎大哉天獨委
居然不與衆鱗比高摩無為還已矣肯向人求升斗水
古來大魚不池活會須終作風雷起殷勤寄語任公子

收拾巨鈎毋進跬

忠侍者自隱靜來既歸覓詩因述其意以贈之
自可呈似簡堂老師也

上手持隱靜書示我刊成送行句飄忽如雲不可留
又歸隱靜山中去自謂為僧亦有緣獲事老師非易遇
第念學道須徧參要證此心歸宿處退量天分不如人
亦復性資非穎悟那能終日坐蒲團只看水上浮杯渡
挑囊亦欲走諸方趁此年齡猶未暮他時參竟却歸來

伴我老師巖上住上人此意似可嘉止是出家兒調度
老師若也可其言不應忘却來時路

寄江朝宗

藕花夾約約寒梅開遍南枝尚未來今日有人傳尺素
却云直待海棠開若賞海棠猶未晚回頭便見春風轉
只恐君無必信言守到此時還更展

呂丞相生日

日躔析木當良月辰象煌煌森羅列忽驚昴宿下天來

果向明時作人傑巍巍德望冠簪纓魯國真儒獨擅名
五百年來世希有端為社稷萬人生胷中素抱經綸術
致身便欲扶王室不學磻溪坐釣磯洗光直取虞淵日
艱難將相罕全才天使我公居上台公能以道佐人主
四海俱知天意回蒼生政爾資霖雨未許超然成獨處
佇看丹詔下嚴宸會見叔敖三相楚向來忠烈已無前
此去勲庸非偶然便使呼韓朝魏闕直須光復舊山川
富貴功名人所欲世間萬事今合足龍門客至亦何言

獨有長年為公祝但願我公如汾陽二十四考中書堂
他年更伴赤松遊永作漢家張子房

寄劉與權與幾

君在桃源山下居我家相距百里餘神仙襟韻固異稟
草木臭味曾不殊一日京華定交契十年太學論詩書
斷金高義薄雲漢濶視往往輕俗徒一時儕輩稍推許
二劉之外稱三吳風雲際會有早晚一吳近已聯朝裾
四子徒懷經濟術躊躇今猶卧海隅蒼生顓顓未蘇息

天意其肯終捨諸丈夫遇則行所學未遇不應為腐儒
共約天台最深處考定古今相與俱所冀激昂平日志
力取功名攄壯圖誰知人事竟好乖合并欲進還趑趄
空堂獨坐弔形影仰天不覺興長吁却憶長安日相親如
友于一朝不會面猶且嫌跡疎何況久睽隔動見歲月
除竟負雞黍約中心當何如牕間琴數弄花下酒一壺
自歌還自酌此意君知無聞君南塘富山水清虛曠絕
如西湖好藏頭角俟雷雨他年同躍天之衢

三老圖既成久欲作詩未果因次任漕韻

我久欲作三老詩苦無佳句能解頤抽軋鄙思成無期
有語欲吐還茹之忽得新篇向此詩恍如春草生謝池
明珠萬斛光陸離璀璨不減珊瑚枝壓倒元白頭欲垂
直與李杜肩相差使我手把不停披憶昨梅花吐瓊蕤
枝頭愛日仍舒遲雖恨捧觴無翠眉吾人臭味自相宜
花下清歡聊共追嗟我老來意氣衰歸心已決不復疑
雖來江右把一麾但知痛飲真吾師尊前況逢冰雪姿

豈容不醉負屈卮二老攬轡方並馳一氣相和如壘簏
百城感化熏蘭芝不事威怒轟雷椎後園探春容我隨
開懷笑語何熙熙丹青寫此一段奇未羨九老洛水湄
何日歸去山之佳時命柴車載鴟夷相逢徑醉莫問誰
飲盡不妨尋酒旗

耿曼老將命鄉邦見過匆遽言別復作詩送之
我方退老湖山上混跡漁樵甘放浪親舊彫零會面稀
與君亦復成疎曠何期擁節到鄉邦得得驅車肯迂訪

開門倒屣笑相迎。盡室歡忻無此況。湖光山色似爭輝。
兩眼韶華更駘蕩。伸眉抵掌話中腸。正好花前倒春釀。
胡為欲去挽不留。忍把陽關容易唱。嗟乎來日苦無多。
況是頻年嬰拙恙。興來亦欲強登臨。龍鍾未免扶藜杖。
目前衰颯已如斯。寧保明年見花放。而今花下幸逢君。
豈容不盡長鯨量。如君志尚迥不羣。治行既高心且壯。
方當聖主急搜揚。為斲豈應遺巧匠。會看唾手取功名。
盡展才猷結旒纁。出處從今不復齊。尊酒何由更相向。

臨期一醉尚何辭後夜月明空悵望

符倅同遊鴈蕩賡其所和范相遊山韻

高才獨立萬夫却險語磨崖山鬼愕翕然萬口競流傳
一字誰能加筆削自憐庸鈍百不聰晚來喜見人中龍
更看揮翰光奪目恍如海蜃浮青紅一時聞望已難攀
相見平居養浩然慷慨胸襟包海岳軒昂高義薄雲天
散材不謂蒙知遇孤迹何期遂保全碌碌未能酬國士
正慚他日尉通泉

夜來同諸公泛舟湖中樂甚因更潭名作北湖
乃作拙句呈諸親友以紀一時之勝云

北山萬仞羅翠屏下有湖水鏡面平山影靜倒千丈碧波光冷浸一天星自有此湖知幾歲居人日日常經行但知湖水鴨頭綠誰人向此含幽情我來正值秋容媚野曠天空風物清烟橫木末斜陽晚雲散溪頭明月升放舟直入波深處水鳥窺人元不驚天晴水暖魚亦樂時見撥刺波間鳴持竿舉網忽有得滿座歡呼山嶽傾

水面黃花更堪愛
盈盈佇立如娉婷
粟玉簪頭紅一點
隨風翠帶還相縈
興來不覺千鍾盡
衆賓皆醉無一醒
漁榔敲罷棹歌起
十里猶聞笑語聲
謫仙死後無此樂
我今此樂真難并
人生適意未易得
此湖從此宜知名
要配北山長不朽
酌酒更告山之靈
我欲結茅湖上住
盡使湖光入戶庭
枕流漱石過一世
不妨清處時濯纓
更釀北湖作春酒
招我四海良友朋
夜夜扁舟同載月
尊前吹笛到天明

又和謝良輔惠箭筍

卜得幽居山繞屋四圍景物何紛郁門前掩映百垂楊
墻裏回環萬修竹風來花氣競薰人日出鳥聲渾滿谷
簷前花樹盡堪攀砌下清泉常可掬暮年得此復何求
但閉柴荆理松菊客至草草具杯盤隨分烹炮薦魚肉
野人頗厭近腥羶長苦春蔬餐不足固知竹箭已抽萌
玉筍瓊簪破苔綠非君好事遠寄將安得今朝充我腹
禮勤意厚已難當仍出長篇相付囑嗟予朴拙豈知詩

祇覺珠璣照雙目朝吟夕詠自忘疲雖欲安眠眠不熟
起來爛煮飽枯腸盡却韭菹并豆粥人生嗜好固不同
此味定知人共欲第慚作報乏瓊瑤惡語雖多謾盈牘

哭元帥宗公澤

嗚呼哀哉元帥公百世一人不易逢堂堂天下想風采
心如鐵石氣如虹正色立朝不顧死半生長在謫籍中
真金百鍊愈不變流水萬折歸必東落落奇才世莫識
欲知勁草須疾風維時中原丁禍亂塵氛漲天天濛濛

衆人畏縮公獨奮毅然來建中興功雄圖一定百廢舉
復見南陽起卧龍嗚呼哀哉元帥公翩然遺世何怱怱
無乃天上亦乏才故促我公還帝宮公還帝宮應有用
何忍坐視四海窮吁哉四海正困窮興仆植僵賴有公
公雖居東都天下日望公登庸公今既云亡天下不知
何時康正如濟巨川中流失舟航當今士夫豈無人請
問誰有公器業誰如公忠良公雖不為相德望震要荒
公雖非世將威稜讐豺狼偉哉奇節冠今古我試一二

聊鋪張靖康元年冬敵人正披猖廟堂驚失色愁靚亦
白囊公首慨然乞奉使欲以口伐定擾攘朝廷是時未
知公公之蚤志不獲償憂國耿耿思有效再乞守土河之
旁命下得磁州翌日徑束裝下車未三日邊騎已及疆
敵人聞之亟退舍足馬不敢臨城墮頃之得兵數十萬
康邸賴公王業昌及公領留守北顧寬吾王恩威兩得
所春雨分秋霜餘刃曾不勞危弱成安強姦雄悉膽落
誰敢亂紀綱嗚呼哀哉公死矣民今有粟安得嘗徂詐

乘我虛近復陷洛陽洛陽去東都雉堞遙相望不聞敢
侵犯豈是軍無糧祇畏我公霹靂手氣懾不復思南翔
嗚呼哀哉公死矣秋高馬肥誰與防天子久東狩去冬
幸維揚都人心戀主謂言何相忘朝夕望回輦斷腸還
斷腸公獨以死請再請意愈剛嗚呼哀哉公死矣萬乘
何當歸大梁咄咄食肉人尚踵蔡與王姦諛蔽人主痛
毒流萬邦人怨天且怒意氣猶洋洋所冀我公當軸日
盡死此曹膏劍鏗嗚呼哀哉公死矣始知國病在膏肓

我公我公經濟才設施曾未竟所長但留英聲與後世
永與日月爭輝光此死於公亦何憾顧我但為天下傷我
聞天下哭公者哀痛不翅父母喪父母生我而已耳豈
能保我身無殃邦人此時失所依波迸東下紛蒼黃我
公我公不復見秋風在處生淒涼百身儻可贖我願先
以微軀當靈丹儻可活我願萬金購其方彷徨愧無起
公計安得長喙號穹蒼嗚呼哀哉元帥公太平時節君
不容及至艱難君始用民之無祿天不容嗚呼哀哉元

帥公古來有生皆有終唯公存亡係休戚千年萬口長
怨恫嗟我草茅一賤士念此抑鬱氣拂胃銜哀揮涕何
有極願以此詩銘鼎鐘

